



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 6

Aluyimertemi tesem ajaklen nungi  
Delhi longbangtsüla: Rakesh Tikait

Lal Thanzara Mizoram  
Congress tir kumogo



VOL. XXI ISSUE NO. 131 (ADOK 131) DIMAPUR ROGONÜ (FRIDAY) TSÜKLAI (FEBRUARY) 23, 2024 ₹ 5.00

## NSCN-IM lenir Khampei Opeiham Konyak khaset



Khampei Opeiham Konyak

par kidang mejanga lia mejangjaba nisung trok arua par ki kakpok aser khaset.

Pa dak tekolak aser teku nung injang khaloktsü aser kinunger temi mozü kidangi anir aoba mapang asü ta ashir.

Par kidang alir kari ashiba agi, pa takdang nungi atsütetba sülen nisungtem mena kazüba takdang nung lia teko nung injang khaloktsü aser kishilen yutsür ao.

Khampei Opeiham Konyak ya security meshitsü atema Dimapur-i arutsü liasü ta ashir.

Tamalen pa ya NSCN-K (Yung Aung) telok nung liasü aser iba sülen NSCN-IM dangi meyip.

Khampei Opeiham Konyak tepsetba mechi Mon nung aliba civil society organization balalai longkak aittsü ayongzükä lir ta osang ajanga ashir.

Kasa mapang Tizit police-ia iba tatalokba indang bushisüngdang tenzükogo.

**Dimapur, Tsüklai/February 22 (TYO):** National Socialist Council of Nagaland-Isak Muivah (NSCN-IM) lenir Khampei Opeiham Konyak yasüng (Bodhbar aonung) 9:30 ako meta Mon district kübok Namsa yimdak par kidang khaset.

Osangtem ajanga ashiba agi, Khampei Opeiham Konyak ya Bodhbar aonung Namsa yimdak

## Minister KG Kenye-i legislator tem senden ayonger

**Dimapur, Tsüklai/February 22 (TYO):** 14th Nagaland Legislative Assembly indang session pezü buba amentsü lia Minister, Parliamentary Affairs, KG Kenye-i legislator tem senden ana ayongzükogo.

NLA Session pezü buba ya February 26 nungi March 1, 2024 tashi amentsü sentong lir.

Minister Kenye-i senden ya State Banquet Hall, Kohima nung February 25, 2024 nü amentsü ta ashir.

Nationalist Democratic

Progressive Party (NDPP) indang legislator tem senden ka nikonkdang 2:00 ako nungi amentsü, anungji party nungi MLA ajak iba senden nung arua adentsü ayongzükä, ta pai ashir.

Kasa anogosa nikonkdang 3:00 ako nungi tenzükä kasa tesem nung 14th Nagaland Legislative Assembly indang legislator ajunga senden amentsü, anungji züngsem ajak medema arua adentsü ayongzükä, ta Minister, Parliamentary Affairs, KG Kenye-isa metetdaksü.

## Manipur tsür kati yimjung khanga Delhi nung lumia longkak aiter



Manipur nung yimjung tanaben alitsü takhangba agüja Manipur tsür kati Delhi nung lumia longkak aitba noksa nung angur.

**New Delhi, Tsüklai/February 22 (Agencies):** Manipur nung tekeraba nung tesunep bener arudaktsütsü asoshi Ati Kilonser Narendra Modi nem angashidaktsütsü mechi Manipur nungi tetsür ka Delhi nung Brehostibarnü hunger strike tenzükogo.

Arishi küm 23 tain Malem Thongam ya Delhi nung azünger aser la kisüng Arts Faculty of Delhi University indang gate nung lumia longkak ait tenzük.

Delhi Meitei Coordination Committee aser Delhi nung aliba Manipur nung den külemi Lamyamba Irawat Memorial

Integrated Trust, (LIMIT) ajanga iba strike ya ayongzükä liasü.

Ato Kilonser Modi-i anir aliba central sorkari Manipur nung tang mepetmesü adoka aliba tangatetep kati bener marutsü tashi lumitsü, ta Malem Thongam-i osangbener dang ashir.

Meitei aser Kuki kin tsünga Manipur nung mepetmesü adoker ita ter ajunger saka tang tashi mera tajung kata agia mali. Kasa mapang kin anaprong nungi nung 200 dak tema takum samaogo aser nisung 61,000 dak tema pei ki yutsür tesem balala nung jenoka lir, ta laisa ashir.

## Manipur HC-i ST list nung Meitei nunger atema tetuyuba agüja aliba tera melenshitsu

**Guwahati, Tsüklai/February 22 (Agencies):** Scheduled Tribes indang list nung Meitei nunger inoktsü atema taoba küm Manipur High Court ajanga totuyuba agüja aliba tera melenshitsuogo. Taoba küm iba teletetba agiba sülen Manipur nung kin balala tsünga mepetmesü adok.

Tetuyuba tejangja Brehostibarnü agütsüba nung, Scheduled Tribe list nung Meitei nunger inoktsü state sorkar nem totuyuba agütsüba indoktsü, koba ajanga Kuki kin jashia liasü.

Taoba küm May ita nungi tenzükä tang tashinung Manipur nung nisung 200 dak tema süho aser tang tashi akhi tensa dangi maruteti lir.

Brehostibarnü totuyuba

agütsüba nung High Court yagi Supreme Court indang constitution bench kati taoba mapang totuyuba agüja aliba athishia liasü, kong Scheduled list nung kin balala inoktsü aser indoktsü atema inyakyim shia lir.

Iba maparen ya Central sorkari inyaksü aser yangji court tem shilem mali. Danga court temi ST list yanglushitsü mesüra melenshitsu makok, ta linük nung tematiba court ajanga shia lir.

Manipur High Court ajanga taoba mapang obendang agütsüba nung, "Iba totuyuba copy anguba anogo nungi hopta pezü tsünga Scheduled Tribe list nung Meitei/Meiti kin inoktsü atema first respondent (state) ajanga asadangtsüla," ta shia

liasü.

Tanü Justice Golmei Gaiphulshillu-i totuyuba agütsüba nung, iba totuyuba ya State of Maharashtra v. Milind & Ors indang ken o nung Supreme Court teletetba den mapet, kong danga court temi ST list yanglushitsü, melenshitsu makok ta shia lir, ta ashir.

"Anungji Para No. 17 (iii) nung shia aliba totuyuba ya indoktsüla aser indoktsü atema totuyuba agütsür," ta obendang nung shia lir.

Taoba mapang Acting Chief Justice MV Muralidaran-i March 27, 2023 nü totuyuba agüja aliba indang ken o ya Kuki kin-i benokba sülen Supreme Court-i reprangshia liasü.

## Sorkari shiranger aser asürtem dang sen meshiba anentsüla: K. Therie

**Dimapur, Tsüklai/February 22 (TYO):** Ayushman Bharat Card alirtem sendaktepa aliba mozüki nung temang anepaluba atema sen memeshitsü shia lir. Tetetzü Ayushman Card aliba senso mashi ka shirangra angati temang anepalutsü ta ashir. Iba scheme nung bill kecha inoksema mali, ta taoba mapang Nagaland Pradesh Congress Committee (NPCC) tir inyaka alisang K. Therie-i sangdong ka nung ashir.

Nagaland nung shiranger aser asürtem dang mozü aliba, X-rays, CT scan, MRI agiba, azü aser danga laboratory nung tendangba atema sen meshir. Shiranger dang sen memeshie temang anepalutsü asoshi iba scheme shidak amshitsüla, ta pai ashir.

Northeast nung senotsü agütsüba yimya (funding pattern) ya Government of India-i shilem 90 aser state-i shilem 10 agütsür. State atema nürburtem nem iba teyari ya agütsütsüa kanga saker. Sorkar mapa inyaker aser pension ngur alirtem dang sorkari iba scheme atema source nung sen katizükä ayur, ta Therie-i ashir.

Mapa meinyaker aser aluyimer mozüki nung temang anepalua amungba sentsüh sorkari menoktsütsüa. Center nungi aruba sen ajak nürburtem tenüng nung arur. Tax ajanga bendenba sen ajak nürburtemi menoker.

Iba scheme ya shirangertem yaritsü atema lir, kechiaser parnok mozüki nung amung tenzükäbo pei sasa pei meyariteter. Anungji sorkari shirang yipten nung alir mesüra süir aliba nisungtemi bill menoktsü meimlatsüla, ta K. Therie ajangasa ashir.

## Kaketshirtem timtemtar, scholarship agüjang: ANCSU

**Dimapur, Tsüklai/February 22 (TYO):** Academic year 2021-2022 aser 2022-2023 atema NEC Merit Scholarship lema agütsütsü menuba ajanga kaketshirtem kanga tim atemer, ta All Nagaland College Students' Union (ANCSU) ajanga Director, Higher Education, Government of Nagaland nem tezüluba ka nung agütsüogo.

Iba maparen ya arsanga inyaksüla liasü, saka tang tashi temulung magütsüba ajanga küm aika academic tsütsü kaketshirtem nüngdakba peritsü asoshi yongyaseta ataba amajok kumdaksür, ta ashir.

Ajidang masü Technical Department nungia tang tashi 2023 indang Post Matric Scholarship (PMS) magütsür, anungji department-i kaketshir

indang scholarship mapang shidak nung agütsütsü asoshi temulung agütsüba majiteter, ta ANCSU ajanga ashir.

Ano All India Council for Technical Education (AICTE) scholarship atema application agütsüba jangjatsü atema temulung magütsüba ajiteta tebilemstü akar ta ashir.

Danga state tem nungbo ministry den lungjemer kanga kera verification process agiogo aser February 26, 2024 tashinung item maparen tembangtsü shia aliba ama inyaker, ajisüaka asen Technical Department nungi tang tashi itemji meinyak, ta ashir.

Mapang shidak nung AICTE scholarship applicants verify masüba ajanga tarutsü nung timtem kar danga adokra Technical Department-i item

khuretji abentsü.

Anungji item tebilemstü asoshi Higher Education aser Technical Department dang tekeraba nung süoki ia item maparen bentettsü ayongzükä ta ashir.

National Scholarship Portal (NSP) kübok scholarship schemes ajanga tekeraba nung salatsü aser lemtsütsü asoshi tim ministry den amteper inyaksü ajungshir.

Item tebilemstü mapang shidak nung bentet-ratetba ajanga kaketshir khuret balala pongdokba kisüng masü saka nenoki Nagaland nung aliba kaketshir ajungtsü asoshi bendanga agütsür inyakba sayutsü. Nenoki iba atema nüngdakba mera agitsü nü dak tamang kaa iba tezüluba agütsür, ta ANCSU ajanga ashir.

## Feb. 29 tashinung Aadhaar aser Ration Card number sendakteptsüla

**Kohima, Tsüklai/February 22 (TYO):** Union Ministry of Consumer Affairs, Department of Food and Public Distribution ajanga Antyodaya Anna Yojana (AAY) kübok Aadhaar number aser National Food Security Act (NFSA) indang Priority Household (PHH) sendaktepba maparen tembangtsü totuyuba

agütsüogo.

Director, Food & Civil Supplies, Nagaland, Chubawati Chang-i sangdong ka nung ashiba agi, seeded Aadhaar number tem ya shidak asütsüla aser Ration Card nung aliba nisung asütsüla ta Ministry ajanga ashir.

Anungji Ration Card nung aliba nisung ajungai FPS nung

inoka aliba ePoS device ajanga February 29, 2024 tashinung FPS mashi nung oa e-KYC yangludaktsütsüla, ta pai ashir.

Temsüa alir shirnoksa NFSA kübok ration card mali, parnoki iba teyari agitsü atema District Officers mesüra sub-division nung subordinate staff tem den tongteprateptsüla, ta ashir.



## Conservator of Forest NTC-i Longleng Forest Division semdang



**Dimapur, Tsüklai/February 22 (TYO):** Japan International Cooperation Agency (JICA) kübok Nagaland Forest Management Project (NFMP) inyakyim asangtsü atema Conservator of Forest (CF), for Northern Territorial Circle (NTC), Rongsenlemla Imchen (IFS)-i February 20 aser 21 nü Longleng Forest Division aser Batch-III, Yachem yimtsüng semdangogo.

Lepareprangshiba senden amenba mapang, DFO cum DMU Head Longleng H. Tokugha Chophy lenisüba nung maparen ajak takok ngua

inyakyonga aoba atema Rongsenlemla Imchen-i Longleng Forest Division nem tenüngsang agütsü. Laisa, Point Activity (EPA) aser Water Harvesting Structure (WHS) tem timba tanga sorkar department aser Village Council tem den longjemer inyakba angazüka kanga pelaba lemsatep.

Yachem yimtsüng nung lai Joint Forest Management Committee (JFMC) aser Self Help Groups (SHGs) tem dang Batch-III, Yachem yimtsüng ya model village ka kümdaktsütsü atema parnok mapang nendaka

inyaktsü ajungshi.

Senden nungsa DFO cum DMU Head Longleng H. Tokugha Chophy-i, lokti pela agizükba o jembiba aser iba sülen ACF cum ADMU Head Longleng Ailong Phom, Deputy Ranger cum FMU Head Bedangmongba Ao nati PPT presentation agüja liasü.

Batch-III, Yachem village nung Rongsenlemla Imchen-i, yimtsüng JFMC aser SHG tem den senden ka ayongzüka amen aser iba sülen nursery plantation, Jhum Agro Forestry (JAF- 1) aser JAF-2 asadanga liasü.

## Capital College of Higher Education nung Language Day mungogo

**Kohima, Tsüklai/February 22 (TYO):** Bodhbarnü Capital College of Higher Education (CCHE) Kohima nung International Mother Language Day mungogo. Iba sentong ya English aser Tenyidie Department-i ayongzüka "Multilingual Education: A Pillar of Learning and Intergenerational Understanding" omen nung ajemdaker agia liasü.

Omen dak ajemdaker oshi aika nung cookbook ka yanglutsü atema inyakyim ka ayongzüka, kong kaketshirtem

Ao, Chakhesang, Angami, Sumi, Lotha, Bihari, Bodo Kachari, Khamniungan, Konyak ta oshi balala indang telok teku lemsaja liasü.

Oshia balala indang telok shia dang parnok ataba oshi jembiba kin indang chiyongtsü recipe ka lemsateptsü asoshi tetuyuba agütsü aser kaketshirtemi parnok sochiokba yimya aser parnoki iba oshi koda jembiteter, iba indang saya liasü.

Ao teloki "nüoshi nung akshi takong" aso, Chakhesang teloki "Thiivo Liinyo" (ak tar

nung azü inoka asoba aon) aso, Angami teloki "Khu Ganyo" (anog aon), aser "Niina" (küpra aon), Sumi teloki "akshi taking Axone" aon aso, Bihari teloki - "Kheer Puri", Bodo Kachari teloki - "Rice Cake Baked in Aluminum Water Jar", Khamniungan teloki - "Kian Pan" (lon), Lotha teloki "Machihan"; ango takong lon aser Konyak teloki "Nyaram" aon soa liasü.

Tetsü oshi wazüka ayutsü aser ajungkettsü nükjidong nung talisa rangloker iba sentong agia liasü.

## Yingli College Longleng nung Dr. Takenori-i lecture ka agütsü



**Dimapur, Tsüklai/February 22 (TYO):** Tokyo University of Foreign Studies, Japan nungi linguist aser scholar Dr. Takenori Murakami-i February 21 nü Yingli College Longleng nung lecture ka agütsüogo.

O jembiba mapang Dr. Murakami-i, north east nung aliba nüburtem aser Japan nunger tsüngda sobaliba linguistic homology indang jembiba liasü. Pai, sobaliba tsüngsang, chiyongtsü aser

libaliro nungi tatishitsü bener arua jembiba liasü.

Paisa, Alima tanabuba rara nung Kohima tongpang nung Japan nunger sepaitem koda sota ayu iba indang bilemtetshia jembiba.

Lecture tembangba sülen tasüngdangba balala asüngdangba aser telangzüba agütsüba sentong ka agi. Iba sentong ajanga kaketshirtem nem puti otsü aser tanü-asüng Japan den tesendaktep indang

tali tejangjaba metetdaksüogo aser iba ajanga kaketshirtem kaketshisatsü bushiba nung maongka tasen bushiyonga aotsü atema tali jangrabangra kümdaktsüogo.

Iba sentong ya, kaketshirtem nem tang jongdak ken o tem indang metetdaksütsü aser parnok academic dialogue nung shilem agidaktsütsü nükjidong nung IQAC den longjemer Yingli College Research cell-i ayongzüka liasü.

## DIPR, Kohima nung anogo ana training tenzüko

**Dimapur, Tsüklai/February 22 (TYO):** Directorate of Information & Public Relations-i ayongzüka Public Address System dak sendakba nung anogo ana atema training sentong ka February 22 nü DIPR Conference Hall, Kohima nung tenzüko.

Training ya mezüngbuba shilem nung Kohima, Dimapur, Wokha, Mokochung, Phek aser Peren ta district trok nungi Technical Supervisors, Senior Operators, Operators aser Assistant Operators tem nem agütsüdar. Training tanabuba shilem nung Zunheboto, Tuensang, Longleng, Mon aser Kiphire district tem densema lir.

Training lapokba sentong nung o jembiba mapang

Director, Information & Public Relations, Dzüvinuo Theünuoi, sentong nung shilem agirtem dang pei mapa bendanga agüja inyaktsü aser PA system tem kanga kümdanga anepalutsü ajungshia liasü.

Maneni trainees tem ya Department nung ketdangsür tejentemi ajungshia liasü. Parnok dang pei mapa nendaka aser peisasa dak temulung lemteta inyaktsü ajungshia liasü.

Iba sentong kübok practical session nung Amplifier, Speaker, Mixer connections, Drive Unit connections, LMT, Battery series connections amala densema PA system amshiba yimya balala sayua liasü.

## JMC nung Integrated Communication & Outreach Programme agiogo



Deputy Commissioner, Mokochung-i Jubilee Memorial College, Mokochung nung Integrated Communication and Outreach Programme ayongzüka agiba mapang Photo exhibition lapoktsüba noksa nung angur.

**Dimapur, Tsüklai/February 22 (TYO):** Jubilee Memorial College, Mokochung nung February 22 nü '9 years of Seva, Sushasan and Garib Kalyan cum Photo Exhibition' dak sendakba nung anogo ana Integrated Communication aser Outreach Programme ka agiogo.

Iba sentong ya Central Bureau of Communication, Field Office, Tuensang-i ayongzüka agi, kong Deputy Commissioner, Mokochung Thsuvisie Phoji alakteta jaoker aser GHS Longmisa nungi tesayur Akum I Jamir, shisalen sayur liasü.

Sentong nung o jembiba mapang DC Thsuvisie Phoji-i, lanurtem atema mapa inyaktsü asoshi maongka alibattem indang aser sorkar indang scheme tem kanga junga amshitsü koda tongtibang iba indang lemsatep.

Tangazükba ya kodanga mademer ta shia pai, kaketshirtem dang maneni angazükyaonga aotsü ajungshi, kechiyong taküm ya kodanga manener aser takok angutsü atema angazükyaonga aotsüji kanga tongtibang lir, ta ashi.

Taküm nung nükjidong ayutsü koda tongtibang iba indang jembiba mapang alakteta jaoker yagi ashiba agi, temulungtetba tulu nung

aremzüka meranga inyakba ajanga nisung ka nükjidong asangsang nung atalokdaksür. Paisa, osang tejangja agüja sorkar aser nüburtem sendakteptsütsü atema Central Bureau of Communication (CBC) yagi tongtibang shilem agir, ta ashi.

Kasa mapang nung shisalen sayur Akum I Jamir-i, Modi-i aniba sorkar kübok taoba küm teku tsüngda nüburtem atema India-i jenjang balala agiba aser takok balala anguba indang lemsatepa liasü.

Paisa, ajak dang sorkari bener aruba inyakyim balala nongita yaritsü aser linük terenlok atema ajak longjemsü ajungshia liasü.

Iba sentong nung DC Thsuvisie Phoji-i photo exhibition lapokja liasü.

Sentong ya Tsungrosenla Jamir, Asst. Prof, Dept of English, JMC lenisüba nung agi aser Dr Imtiwati Jamir, Principal-i lokti pela agizükba o jembiba liasü.. Sentong nungsa Hingnamdi Newme, Field Publicity Officer, CBC, FO Tuensang-i okila aser tepela o jembiba liasü.

Sentong tembangba sülen Quiz tetoktepba ka agi aser takokertem nem sempet agüja liasü.





February 22, 2024 nü New Delhi nung Supreme Court kima AYUSH Holistic Wellness Center ka semzükba sülen Chief Justice of India (CJI) Justice DY Chandrachud aser Union Minister of AYUSH, Sarbananda Sonowal na den tangartem tangokba noksa nung angur.

### Aluyimertemi tesem ajaklen nungi Delhi longbangtsüla: Rakesh Tikait

**New Delhi, Tsüklai/February 22 (Agencies):** Punjab-Haryana interstate arrtsülen aluyimertem longkak aйдang arrshi küm 21 aluyimer ka asüba aser police 12 yiruba sülen aluyimer lenirtemi anogo ana tashi 'Delhi Chaló' thinenä liasü.

Brihostibarnü osangbener den jembidang aluyimertem lenir, Rakesh Tikait-i, "Iba ya mapang talangka raratsü. Tamalen onoki inyakba ama onoki tesem pezüprongla nungi Delhi longbangtsü nüngdak. Aluyimertem ajak longjema alitsüla," ta ashi.

Brihostibarnü Meerut nung osangbenertem den jembidang BKU National otongdar, Rakesh Tikait-i, sorkari aluyimertem Delhi telungi aitsü memelar, anungji election mapang nung aluyimertemia yimtenren lenirtem yimdaki marudaktsüsü, ta metetdaksü.

Paisa, "Lenmang nung kojäl yutsübaji tim masü. Onok lenmang nung parnoki kojäl yutsüra onokia yimtsüngtem nung kasaji inyaktsü. Yimtsüngtem nunga atsü lir. Delhi-i aotsü memelara onokia parnok yimtsüng telungi maitdaksütsü," ta metetdaksü.

Centre sorkari taküm October ita nungi tenzüka 2024-25 kümsük atema sugar mills-i mochi-lu ayimertem nem quintal shia sen 25 agüja aliba nungi sen 340 tashi agütsüsü lemtetogo. Ato kilonser Narendra Modi leniba nung Cabinet Committee on Economic Affairs (CEEA) senden amenba mapang nung iba telemtebaji agia liasü.

Tesülen Modi-i X ajanga, "Linük tesem ajaklen asen adianu aluyimertem dak sendakba ajak inyaktsü sorkari melunga lir. Iba dak sendakba nung mochi alitsü atema sen tutsüogo. Iba telemtebaji agiba ajanga mochi lu ayimer aluyimertem crore aika tajangzük angutsü," ta ashi.

Bodhbarnü Information & Broadcasting Minister, Anurag Thakur-i, Centre sorkari longkak aiter aluyimertem den jembitsü melunga lir; parnok ya asen adianutem lir, ta metetdakja liasü.

Aluyimertem income teimba akümtsü atema Modi sorkari telemtebaji aika agiogo, ta pai ashi.

Paisa, "Sorkari Minimum Support Price (MSP) anasü agi teimba kümsüogo. Tesüiba küm ter tsüngda wheat, tsük aser menjang alizükba nung sorkari sen 18.39 lakh crore indokogo; iba denji medemdangra taoba UPA sorkar mapang nungbo item alizükba nungji sen 5.5 lakh crore dang indoka liasü," ta metetdaksü.

Bodhbarnü Datta Singhwala-Khanauri arrtsü nung aluyimer ka asüba sülen Bharatiya Kisan Union (Charuni) züngsemtemi Brihostibarnü Haryana nung tongtibang lenmang ajak mokdang longkak aitogo. BKU tongti, Gurnam Singh Charuni-i longkak aiterem dang ketdangsertem aser security sepaitem den meraratsü ajungshia liasü.

Bodhbarnü aluyimer

Subhkarän Singh tekolak nung injang agi khashiba sülen asü, ajisüaka injangji rubber injang asü shisa injangar mejangja.

Brihostibarnü Muzaffarnagar nung aluyimertem senden nung jembidang Bhartiya Kisan Union lenir, Naresh Tikait-i aluyimertem dang Haryana aser Punjab nungi aluyimertem madak tashiyim amshiba aija February 26 aser 27 anogotem nung tractor march ayongzükä lir, anungji iba sentong nungji ajak nem shilem agidaktsüner, ta mepishi.

Tesülen Naresh Tikait-i aluyimertem takhangba onük balala metetdakja linük Tir nem agütsüsü asoshi shidi ka district magistrate ket nung agütsü.

Aluyimertemi sorkar dang Swaminathan Commission-i benokba ama MSP atema ozüng ka yangluang, ta akhangba den külemi taoba mapang Centre sorkari benokba ozüng tasen asem anema longkak aйдang aluyimertem anema benoka aliba ken o ajak agientsü, arrshi küm 60 ser temapur aluyimertem aser alu nung aayangertem nem pension scheme agüjang ta takhangba agüja February 13 nungi tenzüka longkak aiter.

Aluyimertemisa Lakhimpur Kheri district nung aluyimertem menüngsetba tatalokba nung aibelenertem nem temerenshi agütsüsü, Electricity Amendment Bill 2020 agientsü aser Land Acquisition Act of 2013 ozüng tanaben benoktsü akhanger.

### External affairs minister Jaishankar-i Japan aser S Korea semdangtsü

**New Delhi, February 22 (Agencies):** External affairs minister, S Jaishankar-i March 4 nungi tenzüka South Korea aser Japan semdangtsü; iba mapang nungji pai ketdangsertem den linük tsüngda tesendaktep, regional aser international onüktem nung o lemteptsü, talisa Indo-Pacific nung tayongzükba onüktem atema jembitsü.

Republic of Korea aser Japan na ya India atema tongtibang partners lir, aser tang Jaishankar-i linük anaji semdangba ajanga linük ana denji tesendaktep tajungba akümtsü aser tarutsü nung amalitepa inyaktsü asoshi jembitsü, ta ministry of external affairs (MEA)-i metetdaksü.

External affairs minister-i mezüng South Korea yimtiba, Seoul semdangtsü aser Korea Foreign Minister Cho Tae-yul tena leniba nung 10buba India-South Korea Joint Commission Meeting (JCM) senden amentsü, ta MEA-i metetdaksü.

Anogo ana tsüngda Jaishankar-i South Korea nung tongti ketdangsertem, think tanks nung tekolakpurtem aser yangji aliba India nunger sensotem ajurutsü.

India aser South Korea na tsüngda Special Strategic Partnership lir aser linük anati shishilembaba, investment, defence, shisaliok aser technology densema lenla aika nung amalitepa inyaker.

"Pai semdangba ajanga linük anati regional aser international onüktem nung tangatetba lemsateptsü asoshi maongka angutsü," ta MEA-i metetdaksü.

Maneni Jaishankar-i March 6 nungi 8 tashi Japan semdangtsü. Tokyo nung Jaishankar aser Japan Foreign Minister Yoko Kamikawa na 16buba India-Japan Foreign Ministers Strategic Dialogue akatsü.

"Minister anati linük ana tsüngda tesendaktep, regional aser international onüktem nung o lemteptsü aser Indo-Pacific atema jembitsü," ta MEA-i metetdaksü.

Jaishankar-i Japan semdangba ajanga defence aser digital technologies, semiconductor supply chains, clean energy, high speed rail, industrial aser connectivity sectors nung amalitepa inyaktsü atema jembitsü asoshi maongka angutsü, ta MEA-isa metetdaksü.



February 22, 2024 nü Bengaluru nung Karnataka Chief Minister, Siddaramaiah-i sorkar school tem nung azünger tanurtem nem Ksheera Bhagya Scheme tenzükja school tanur ka nem 'Ragi Malt' jemdaktsüdang tangokba noksa nung angur.

### Delhi nung Congress aser AAP na tsüngda Lok Sabha menden lemogo

**New Delhi, February 22 (Agencies):** Delhi nung Congress aser Aam Aadmi Party (AAP) na tsüngda Lok Sabha menden lemsaogo, ta Brihostibarnü osang ka ajanga metetdaksü.

AAP-i Lok Sabha menden pezü aser Congress-i menden asem nung tokteptsü atema party ana tsüngda bangjemogo. Congress lenir kati, Congress-i toktepnüba Lok Sabha menden ka shimtsü mepishiba ama AAP-i agizükba sülen party ana tsüngda tatembangsa telemtebaji agiogo, ta metetdaksü.

Taruba Lok Sabha election atema Delhi nung Congress aser AAP na loktepbaji aser menden lemsaba official osangjibo Hokolbarnü ang sangdongtsü.

Delhi nung Lok Sabha menden 7 lir aser Congress-AAP teloktepi East aser North West Lok Sabha menden na nungbo takok angutsüsa jenjang ka nung lir.

Osang angazükba agi party

atema tasembuba mendenji Chandni Chowk, New Delhi mesüra West Delhi Parliamentary menden shimtsüa akok.

Osangbener den jembidang Congress lenir kati, "Tasembuba menden atemaji party anapronglai benokba ama takok angutsüpur candidate toktepdaktsüsü; ajisüaka Congress-i East aser North West Delhi Lok Sabha menden na nungi toktepdaktsüsüa akok," ta metetdaksü.

Ano külen tanga osang ka ajangabo, AAP-i South Delhi, West Delhi, North West Delhi aser New Delhi mendentem nungi candidates toktepdaktsüsü aser Congress-i Chandni Chowk, East Delhi aser North East Delhi constituencies nungi tokteptsü, ta metetdaksü.

Tang Delhi nung Lok Sabha menden tenetprongla nung BJP züngsemtem lir.

Taruba Lok Sabha election April-May nung agitsü.



February 22, 2024 nü New Delhi nung aliba Talkatora Stadium nung taoba mapang Samajwadi Party lenir, Swami Prasad Maurya-i pa indang party tasen- 'Rashtriya Shoshit Samaaj Party' tenzükba sentong nung tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, FEBRUARY (TSÜKLAI) 23, 2024

### Lenmangbo tenlatsüla

**T**awa Wokha town ajangba National Highway yanglutsü mapa agizüker teloki tesem kar nung mapa metenzüki menuba anema Lotha nunger lokti tentetem longjemer longkak aitba sülen government tashi amshia District Administration-i lenmang ulushia yanglutsü atema alimenok (compensation) agütsür alirtem meyong kiojen bendoktsüyonga aoba jagi asen nübortem tangatetba nung anünga aliba agi, Wokha lenji dang masü, Nagaland tesem aika nung terenlok mapa meinyaktetba kuli angur. Atangji, gari lenmangji yimkong lenmang, aji yim lenmang, anungji yimten tashi amshia ulutsü aser ilatsü akok. Ajisüaka, ano külen Nagaland nung ali kiburtem dang nungi tamajungbaji state government lir, kechiyong state government-i ozüng raksar aser tashi mangartem anema kecha meinyaktetter. Ibayongji, Nagaland nung alirtem, joko, mapang talangka tetsübu, terata aser timtem ashidak makaba tensa tia nung alir. Nagaland nung alirtembo, tetsüng agidang jajaba nebo, anungji gari lenmang junga meyanglutsüyonga kecha masü ta bilema odang toktsür ama tangaribo bilemetsüsa asenok alir. Kasaji, Nagaland nung alirtembo tokolak nung tzüshi bener tzübo nung tzü tateta jema aruba nebortem, anungji parnokbo tzü alia ajemyonga kecha masü ta yutsür amato tangaribo reprangtsüsa asenok alir. Iba amaji Nagaland nung alirtembo tekong lu ayimertem dangji light kangabo menüngdaker, anungji anogo piyong light meyokyonga kecha masü ta lemteter inyaker amato tangaribo bilemetsüsa asenok alir. Kasaji, Nagaland nung alirtem asoshibo pei sen agi peisasa yaritetsüsa private mozü ki peria lirji, government mozü kibo menüngdaker amato tangaribo bilemetsüsa asenoki alir. Iba ama bilemba aser angatetba ya kodang komaser asenok rongnung tenzükar tesüngmangtsüka lir. Item ajakji asenoki tangar dak dang atonger dang ashi, aji aseni asen kija agitsü bilemba nungi lokti tebilemetsü kümdaktsüba mapa ka lir. Asenok ajaki gari lenmang tesadem tajung aginer, saka temenok dalang meshia agir külena asenoki asen liji yimkong lenmang atema magütsüner. Shitakba agibo asen senzütsü atema government dang mepishia asen li aser asen ki ajanga gari lenmang yanglutsü atemabo asen liji angati tenla agütsütsüla, ajisüaka asenoki yimkong lenmang atema ali tilaka agütsüba agi kanga akoksatsü amai bilemer. Iba tangatetba kolok aser mulungjangji alima rajang kümdaktsütsüba kolok aser mulungjang lir. Atangji, asenok aika dak tangatetba tajung lir, anungji lenmang yanglutsü atemabo ali angati agütsür. Ajisüaka, ajak kasa masü. Karbo anarongdena takaba ajak agi kimung ka alinung, aji yimkong lenmang yangludang tudoktsüsa kümra talidak makatsü. Ibai angatetba agi government-i alimenok agütsür. Aji oda, sensakertem indang bilemetsü dang takartema ajangzüker. Tangar state-tem nung gari lenmangtem tajung süra asen lima nunga kasaji tajung asütsüla, kechiyong asenok ajak India nung aser asenok ajak asoshi kasa mapa atema kasa senpong nungi senotsü yoker. Joko, teinyakertemia pei tetsü taso lima meima mapa shitak inyaktsüla aser ali kiburtemia pei li dang nungibo Naga lima temeimba meima yimkong lenmang yanglutsü asoshibo mekorui ali tenlatsüla. Idakji tepela lir. Idak nung jagi Nagaland topur junga renlok tenzüktsü. Iba ama tenla jagi pei lima nung temelenshi tajung bener arur. Atangji, gari lenmangji Highway dang masü saka alu lenmang süli, kiyong lenmang süli, akok tashi khen yangludang sademsadema jungjunga yanglutsüsa ali kiburtemi ali tenlatsüla aser nübortemia government den yaritepa lenmangji anepalua reprangtsüla, kechiyong lenmangjibo government-i yanglutsür saka lenmang kiburjibo asenok, asen meyong.

## OLEMSABANG

### KISET SHIRURUMESÜBANUNG TANGAZÜKTSÜ

~ Dr. Merennungba

(Yashi adok nungi...)

5. Nisungi chir anungba chiyongtsü ajak khenbosa soer külenang agüjang. Iba yagi tashitak nungi jenbua alitsü. Ak-i techanu abenbaji ita asem (3) hopta asem (3) anogo asem (3) lir mepur (plus minus 2/3 days) Anungji techanu meputsü hopta ka shi lia nungi tetsü-nem chiyongtsü talem junga renemer agütsütsüla. Kokra tanga nungi bener aruba chiyongtsü magütsütsüla. (Waste product from restaurant, hotel) etc. Aoksaba, azükba, merenshiba timtem magutsüi yuang (frighten, beaten, threaten) etc. Yamala timtem ajanga khenkhenbo techanu memeputeti timatemsü. Ano techanu tasüa meputsü.
6. Yakta ulua akümtsü atema küm nung khenbosa tsüla mozü agüjang. Techanu nem ita asem (three months) tain kümer külenang tsüla mozü agüjang. (Deworming after 3 three months old). Kechiaser tila nung agütsüba ajanga poknüng (internal organs) junga aintsü aliba raksatsü. Ano tasüba-a ajurutsü akok, tebong (Male) chanu castration ita ka tsüngta tain alidang agiatokang. Ibai ajanga tekaraba aintsü. Tain kümer agira khenkhenbo timtem palaka koba dang Hernia ta ajar ajurutsü akok.

#### Tashitak Tekumdangtsü (Precaution for disease)

Ak tashitak aika rongnung kibur takoksa tulutiba ajüruba aser tang tashi nung asen limai mapang shia aruba rongnung swine fever/Hog cholera tashitak ya lir. Asenoki iba tashitak dang Ak süra taka ajar. Iba tashitak ya mesen ka koba dang virus ta ajaba tapu ka (Strain) ajanga shiranger. Ibai aneptsü tanü tashi mozü mangur. Iba tashitak mesen (Virus) ya mopung nung bener senzür. Anungji anogo ishika tsüngda kiyong (Colony) nung ak shirangtsü aser anogo ishika tsüngda asütsü. Temang kanga meta-a shirangtsü tepok akangtsü (constipation) tasübaji noklang nung noklang asütsü akok (100% mortality rate). Iba tashitak nungi kümzüka ayutsü tajungtibaji swine fever vaccine meshirangdang agitsüla, kokra küm shia agiang.

Tanga tashidak adokra veterinary hospital yakta bushiang. Mapang shia vitamins aser Mineral mixtures agüjang. Ibai ajanga Ak mesür-i tajangzük angutsü.

#### An mesüba (Rearing of Poultry)

##### An ya tapu asem (3) atema mesur

- a. Entsü atema (egg purpose) - Entsü atema mesüba tajungtiba ya white leg Horn lir. Ibai sentsü temesüng, temang tila, küm nung entsü noklang ana (200) tema akotsü akok (can lay more than 200 eggs in a year)
  - b. Shi atema (Meat purpose) - Broiler breed ya shi atema dang mesür. Sentsü temesüng, temang tulu, ita ka tsüngta kg ka (1) shi akümer aser ita ana (2) asem (3) nungbo 3-5 kgs tashi akümer.
  - c. Shi aser entsu atema (both meat & egg purpose) - Asen lima bulua mesübaji kuroiler ya lir.
  - d. Local/Indigenous/Non-descript - Iba ya tsürabur mapang nungi asen lima mesüba lir sentsü balala, temang tila kara-mainer. An ya tashi tila lir, kümdanga memesüra kiburi takoksa aiben ajurutsü. An mesüba nung tekümdangtsü itemi meteta alitsüla.
1. An kiji nisung alidak nungi 100 metres shi pilar yanglutsüla (100 metres approximately away from human dwelling). Ki nungji windows/ventilation peria inoktsüla. An normal temperatureji 105-106Å° F tashi alir aser ibai ajanga temang nungi mopung tamajung (Ammonia gas) tali atoker. Kodang windows aser ventilation peria melilir mopung tamajung ya ki telung nung lia tanaben an-i agitsü (inhalation) aser An-ji maintsü. (Retarded Growth). Anungji an yakta mainba kuliji ibai-a ka lir.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir



## Assam sorkari taneptsüba nokdangba Khristantemi aitsür

**February 21, 2024:** Tawa Assam sorkari sayatenya ajanga shirang aneptsüba nokdangba atema state nung Khristantemi sorkar aitsüogo.

Tawa Assam cabinet-i 'Assam Healing (Prevention of Evil) Practices Bill, 2024' ozüing agizük, koba ajanga narongjakertem, o mejembitetertem, nüpkokertem aser shirang balala aneptsüba nokdangba. Tamangba yimsü lenirtemi sensakertem aser timtemertem madak inyakba nokdangtsü atema iba ozüing benok.

Assam chief minister, Himanta Biswa Sharma-i X ajanga, "Iba ozüing ajanga taneptsüba sentongtem ajak nokdangtsü aser treatment tenüing amer sensakertem aser timtemertem madak ambangyima inyakertem nem temerenshi tulu agütsütsü," ta metetdaksü.

Osangbenertem senden ka nung jembidang Chief Minister-i, "Taneptsüba tenüing atemer tribal nisungtem yimsü meypdaksür. Taneptsüba nokdangba ajanga state nung yimsü wazüka ayutsü," ta metetdaksü.

"Onoki Assam nung evangelism nokdangner, aser

iba dak sendakba nung taneptsüba nokdangogo. Taoba cabinet senden nung agizükba ozüing ya kanga tongtibang," ta pai ashi.

Ajisüaka Assam Christian Forum (ACF)-ibo, iba ozüing ya linük temzüng nung agüja aliba yimsü temeden anema lir, ta ashi.

Assam nung Khristantemi lisopurtem Khristan yimsü dangi meypdaksütsü atema taneptsüba sentongtem agir, ta olulu jembiba mapang nung sorkari taneptsüba nokdangogo.

ACF Tir John M, general secretary Rev. Chowaram Daimari aser ACF otongdar, Alen Brooks nungeri külem sangdong ka ajanga, Khristantemi temenen lenmang ajanga taneptsüba mapa inyaker ta jembiba osangji tai, ta metetdaksü.

Parnokisa, Khristan hospitals aser dispensaries nung lateta aliba ama medical service dang agütsür, ta metetdaksü.

ACF lenirtemi, sarasademtsüba ajanga aneptsüba ya temeim mapa ka lir; iba ya Khristan yimsü dangi meypdaksütsü atema masü, ta metetdaksü.

Chief Minister-i jembiba o dak sendakba nung ACF-i, "Iba oji talisa Khristantem anema lir, ajisüaka iba oji ajanga yimsü balala nungi medical workers-a kongshir. Tenla kidang süaka, (Hindu nunger) tekülem kidang süaka mesüra mosques nung süaka temoatsü meshia sarasademba tekülem nung tongtibang shilem ka lir," ta metetdaksü.

ACF-isa, "Sarasadem ya yimsü balala amanger ajaki benshiba ka lir aser Tsüngrem dang nungi taneptsüba meshia sarasadem. Iba ya tim masüba lenmang ajanga aneptsüba lir, ta züinghibaji yimsü tsütsü tanela aser taküm anema lir," ta metetdaksü.

ACF-isa tawa Hindu yimsü alia amanger telok kati missionary temi lapokba school tem nung Khristan temaitsütem agienang ta akhangba aitsü.

Kutumba Surakshya Parishad Tiri Khristan school tem nung Khristan temaitsütem agienang ta tuyuba dak sendakba nung ACF-i, iba ya telemsa adokdaksütsü atema lir, kechiyong rejutem nung Khristan temaitsütem inokba ajanga kaketshirtem mekongshir, ta metetdaksü.

## Iraq nung tongti putir, Sako-i Khristantem longjemtsü ayongzük

**February 22, 2024:** Iraq nung tongti putir, Louis Raphael Sako-i shidi ka ajanga linük nung Khristantem ajak longjemtsüla, kechiyong Khristantem tsüingda telemsa adokra linük nung Khristantem samatsü, ta metetdaksü.

Iraq yimtiba, Baghdad nung aliba Chaldean Catholic Arogo nung tongti, Sako-i, tang linük nung yimtenren tensa aser telemsa adoka aliba ya aitsütsü tetemsü, kechiyong ibaji ajanga nütsüing ajema aliba Khristantem tsüingda telemsa adokdaksür, ta metetdaksü.

Arrshi küm 75, Sako-i züluba "Unity, then unity: Every household divided against itself will be ruined," ta ajaba shidiji February 17, 2024 nü sangdonga liasü.

Sako-i shidi nungji Middle East nung yimtenren tensa aser rara ajanga Khristantem densema yimsü balala amangertem ajak kongshiba metetdakja lir.

"Tang yimtenren tensa aser telemsa ajanga Middle East nung tensa kanga mejungi lir; item ajanga tanga kecha masü saka temenen shisangdaksür," ta pai ashi.

International aser regional tentetemi Iraq nunger tsüingda telemsa adokdaksütsü atema inyaker; yimsü aser kin nung ajemdaker Iraq nunger tsüingda telemsa adokdaksür, ta pai ashi.

2018 küm Pope Francis-i Sako cardinal shima liasü.

Sako-i, Iraq nung sorkar balalai Iraq nunger rongsen aser nüburtem temeden wazüka meyteter, aser ibaji ajanga Khristantem kanga takoksa ngua bendangleni aotsüsa akümer, ta ashi.

Paisa, "Party kari Arogo lenirtem nem senotsü aser maangka balala agüja mesüzüker, aser ibaji Arogo aser kiojen azioktsü atema lir," ta ashi.

Sako-isa, pai France, Belgium aser Netherlands semdangba mapang nung Chaldean nunger tsüingda telemsa adoka aliba jangjaogo, ta metetdaksü.

Sako-i Chaldean nunger Khristantem dang, pei maitsü aser Arogo jangjatsüla aser longjemtsüla; iba dak alia Khristantem tsüingda ochishia tongtepratepa alitsüla, ta ayongzük.

"Pei atema dang bilemba ajanga telemsa adokdaksür, ajisüaka ken o jembiba, atsü-anemtepba aser tangatetep ajangabo telongjem adokdaksür," ta pai ashi.

Sako-i, Arogotem longjemtsüla, Chaldean nunger, Syriacs aser Assyrian nungertemi kati ka akhümtsübuteba longjemtsüla, ta ayongzük.

Iraq nung Khristantem

teimbaka Chaldean Catholic Church nung züingsemtem lir. US-i Iraq mamakba mapang aser Islamic State kiralongrartem merentsü tenezükba mapang- 2003 küm Iraq nung Khristan nütsüing million 1.5 liasü, ajisüaka rara aser reshikangshi ajanga Khristan meyirjang aika tanga linüktemi jenshia ao.

2022 küm tashi nungbo Iraq nung Khristan nütsüing 150,000 dang kümogo, ta US Department of State's International Religious Freedom-i metetdaksü.

## ANOGO ABEN TSÜNGREM DEN

### Tsüngremer tenangzükbatem au ta lir

"Aser pai nütsüing teranaji külemi aja, aser tashitak aneptsütsü aser temenen tanela ajak madak ain aser tashi pamok nem agütsü. Aser Tsüngrem yimli sayutsüingtsü aser shiranger aneptsütsü pai pamok yok" (Lk. 9: 1,2).

Tesülen Yisui pa sülen anidaker 70 kasa tenyaba mapai yok, aser parnok tepela nung yamai ashi, "Kibuba ne tenüing nung temenen tanelatemia onok dang angar" (Lk. 10: 17). Item missionarytemi temenen tanela alibaji meteta liasü aser ibaji inyaksü parnok aja ta parnoki züingshi. Tebilem nung, temenen tanüla tashi-i parnok mapa nokdangtsü ta Yisui yokba missionary-tem jagi tsübuwa bilemer alitsü. Saka temenen tanela madak takok anguba nung süngmangseta tepela nung shilang. Ajisüaka, taoksatsüka Yisui parnok dang ashi, "Temenen tanelai nenok dang angaba nung tepela saka kotak nung nenok tenüing zülua aliba asoshi pelaang". (Lk 10:20). Yisui osangtajung sayutsü aser aneptsütsü asoshi 70 yok, saka pamok ajaki temenen tanelai parnok dang angaba osang dang bener aru. "Pastor aser Deacon tiyongtsü tesüdaksü" ta Yisui langzü südi. "Tsüngrem yimli tiyongtsü südakjang, tenezükba tiyongtsü südakjang".

Ibaji tekümdangtsü. Nai ne taküm nung aser tangar taküm nung amang yimli den raratepdang, nai ne sasa na tanelaren nüji asoshi rarar ka ama bilema temenen tanela kishi züing ajak nung repranga aotsü akok. Saka ochi agi na nüji kümdaksü, temetetba agi masü. Amang odaktsütsü asoshi na maja, tesangwa dangi meyiptsü na aja. Ne dak Tsüngrem jakla meketra aser Khrista dak aliba jakla melira na kecha tashi makatsü.

Kibuba amang temelem koktettsü Ne tesangwa teperi lir. Halleluha !

### Khristan aser Alima - Mathi 9:9:13

Kodang Yisui, "Kü sülen arung" ta aja shirnoki langzür parnok kija taküm nung temelenshi ka akatsü Yisui ashir. Yisui sülen anidakba nung mapang ka dena lir, menden nung, mulungsentsü nung aser tesendaktep nung melenshiba mapang. Kati alimaji tesatempa tuluba angur, meimchir ajak lungjema alitsü aser meimchir alizüing kechi aji angatetta akümer, aser tamang ulushia akümer.

Asenok dak alima ajak ayimjemtsüsa tekolok maten. Temelenshiba putu den putepa aotsü asoshi mapang nungdaker. Aji saka asenoki Yisui tesayuba aser pa taküm tatishitsü tamang katetta anidakra asenoki asen shidak ayakji angatettsü. Asenoki, Tsüngremi alima oda meim nung ... tetezü tali-tali angatetta akümdang asenoki, "Onok, alima nübur!" ta tali jangjaa shitettsü.

Item ya shisadangang: "Alima" tetezü kechi? Kati "alimaji" koda meimtsü akok. Kodang "alima" indang jembir koda nükjitong tejangja aser takang iba asoshi ayutsü? Telok nung dena aliba kiyonger meimtsü nai timtema bilemer asü? Meimchir kin jurila akümtsü nai koda bilemer?

Sarasadem: Ne kilir nem ne tashi agüjang, aser ne kilitsür chir kümzükang. T.Ken 86:16.

Tenangzükba: Kibuba pei nübur nem tashi agüjang. T.Ken 29:11.



Pakistan kübok Gujranwala yimti nung tang tesüdak Tenla ki ka noksa nung angur. St. Mary Tenla kidang nisung masemba agi tanaben ulushia süshitsü atema yaküm November ita nung foundation lung azünga liasü. Iba Tenla ki süshiba maparen nung Muslim nungertemia senotsü tenla agüja yaridar. Iba kiyong nungji akhidang nungi Khristantem aser Muslim nungertem yimjung nung dang lia arudar.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Somomo**

(n) am dong tulu nung atangba süngjang (banana)  
\* Somomo ya temang asoshi chiyongsü tajung ka lir.

**Song**

(n) merang achiba (rust)  
\* Merang song agi machitsü atema sentsü ateper.

**OLONG PAITEP # 6706**

|    |  |    |   |    |   |    |  |    |
|----|--|----|---|----|---|----|--|----|
| 1  |  | 2  |   | 3  |   | 4  |  | 5  |
|    |  |    |   |    |   |    |  |    |
|    |  |    | 6 |    | 7 |    |  |    |
| 8  |  |    |   |    |   |    |  |    |
|    |  |    |   |    | 9 |    |  |    |
|    |  | 10 |   |    |   |    |  |    |
| 11 |  |    |   |    |   |    |  | 12 |
|    |  |    |   | 13 |   | 14 |  |    |
| 15 |  |    |   |    |   |    |  |    |
|    |  |    |   |    |   |    |  |    |
| 16 |  |    |   |    |   | 17 |  |    |

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6705 TELANGZÜBA**

**TIPIEN :**

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kiochtsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsütsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

**NAI-A YA METETTER MA**

**ALIMA NUNG TIMTIBA AYOKBA KENSEP KAR:**

- #1 - Michael Jackson - Thriller: 51.2 million
- #2 - Eagles - Their Greatest Hits (1971-1975): Certified Sales: 41.2 million
- #3 - Shania Twain - Come On Over: 30.4 Million
- #4 - Led Zeppelin - Led Zeppelin IV: 30.4 million
- #5 - AC/DC - Back in Black: 30.1 million
- #6 - Fleetwood Mac - Rumours: 29.3 million
- #7 - Whitney Houston - The Bodyguard: 28.7 million
- #8 - Adele - 21: 27.1 million
- #9 - Alanis Morissette - Jagged Little Pill: 25.4 million
- #10 - Pink Floyd - The Dark Side of the Moon: 24.8 million

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Tripura nung Bajrang Dal züngsemtemi longkak ait**



**Tripura nung Bajrang Dal züngsemtemi longkak aitang tangokba noksa angur**

**Agartala, Tsüklai/February 22 (Agencies):**

Tripura yimtiba Agartala kübok private Christian missionary school ka nung tesayur kati kaketshir ka Hindu temaitsü keta aliba kisen (wristband) ka inoktsü memelai rakzüka ayuba sülen Bajrang Dal züngsemtemi longkak aitba sentong ka ayongzüka liasü aser ashiba agi, iba ya tamangba yimsü anema lir.

School-i sangdong ka ajanga ashiba agi, iba tatalokba indang angazükba sülen tsürapuri principal nem osang agütsü, shiba takaratiba nung jenjang tapet agitsü tenangzüka agütsüogo.

Iba sülen tsürapur aser vice-principal na senden ka ayongzüka aser tesayursang yagi iba

kaketshir nem pa indang kisen meyipa agüja liasü.

Bajrang Dal otongdar kati iba tatalokba ya aitsüogo aser missionary temi achaayangba school tem nung tamangba yimsü dak sendakba nung temeden koma agütsür iba indang süoki ia bilemba lemsatepba den iba amala inyakyim ajanga tanur ka renloka aoba nung tetsükdaktsü adoker ta ashi.

Otongdar yagisa, iba tatalokba ya kaketshir sang tamangba anema inyaksangshiba dang masü saka iba ya Hindu tamangba yimsü anema lir aser iba ya sobaliba, libaliro aser temzüng ozüng kübok temeden aliba anema lir ta ashi. Iba telok

yagisa tesayur sang dang kisen meyipa agütsütsü asoshi tetuyuba agütsütsü khangogo.

Manoj Nath, shiba faculty züngsem ka aser iba kaketshir tebu lir pai, iba kisen ya kanga dang tongtubang lir, koba Gujarat nung Somnath Temple nungi bener aruba lir, ta ashi.

Ken o dak sendakba nung Holy Cross School Principal Rev Jilson Tom-i, iba tatalokba asoshi kanga sasar ta ashiba den secular values aser tamangba yimsü ajak akümsübuttsü atema school bendanga agütsür lir ta ashi.

Paisa, school-i nisung ajak religious freedom dak sendakba nung temeden aliba magintsütsü, ta ashi.

**Manipur: RPI-A-i ozüng alema arur alirtem anintsü akhang**

**Imphal, Tsüklai/February 22 (Agencies):**

Republican Party of India (RPI) Athawale national secretary Thounaojam Maheshwar-i, Centre aser sorkar dang, Manipur kübok Myanmar den arrtsü nung aser Mizoram south-west len Churachandpur-Khoupum Protected Forest nung ozüng alema amenoker alirtem central force amshia mintoktsü takhangba ka agütsüogo.

Imphal nung osang benertem den sensaksemba mapang actor aliba yimden yimsüsür akümsang yagi, Mizo Students' Union (MSU)-i Kuki-

Zo nunger kar danga Manipur nungi Mizoram-i meyipa yokra Meitei nungertem Mizoram nungi mintoktsü ta tekümdangtsü metetdaksüba angashi kanga mepelaba lemsatepa liasü.

MSU sangdong ya aija Thounaojam-i ashiba agi, iba amala tamendakdak ajanga telungpurtem den sendaktepa aliba sayur koba linük national security aser integration atema lendong lir. Paisa, MSU inyakyim asadangtsü atema state sorkari Ministry of Home Affairs dangi shiti zülutsüla, ta ashi.

Manipur Chief Minister N Biren Singh-i, pai aniba sorkari state nung 1961 küm sülen arua alirtem bushiteta meyipa yoktsü sentong lir ta sangdongba sülen tang iba ya atalokogo.

MSU-i, Manipur sorkari sandongba ama jenjang agia Mizo mesüra Kuki-Zo nunger kar danga meyipa yokra state nung aliba Meitei nungertema Manipur-i meyipa yoktsü, ta tekümdangtsü metetdaksüogo. Iba kaketshir lokti tentet yagisa, parnoki Mizoram nung aliba Meitei nungertem ajak bushia oa list ka yanglur lir, ta ashi.

**Lal Thanzara Mizoram Congress tir kümogo**

**Aizawl, Tsüklai/February 22 (Agencies):**

Taoba health minister aser Mizoram Congress vice president Lal Thanzara, state Congress tir asütsü atema shimogo, ta party source kati metetdaksü.

Mongolbarnü election agiba sülen Lal Thanzara, shiba taoba chief minister aser ex-Congress tir Lal Thanhawla tenu lir, pai

Zodintluanga Ralte tsükdakja liasü, shiba taoba mapang minister ka liasü. Thanzara-i iba election ya vote 12 agi koka liasü, ta source-isa metetdaksü.

Election indang result ya Mongolbar aonung sangdonga liasü.

Lal Thanzara-i party tir mapa Lalsawta ket nungi melenzüktsü.

Vice president Lalnunmawia Chuaungo-i vote 1,093 angu aser pa den toktepsang Congress legislator C. Ngunlianchnunga-i vote 763 ngua liasü.

Maneni Lalmalsawma Nghaka-i, taoba mapang legislator Lalrindika Ralte vote 354 agi koka treasurer mapa maneni abentsü.

**GOVERNMENT OF NAGALAND  
OFFICE OF THE LABOUR COMMISSIONER  
NAGALAND: :KOHIMA  
New Capital Complex**

NO.LBR-984/84/552 //

Dated Kohima, the 22nd February, 2024

**CIRCULAR**

This is to inform to all the interested candidates that, the training course on cutting & tailoring, knitting and embroidery for the year 2024 is scheduled to commence from April, 2024 at the respective Labour Welfare Centres (LWC); (i) LWC Dimapur (ii) LWCTuli, Mokokchung (iii) LWC Wazeho Mini Cement Plant, Phek and (iv) LWC Doyang Hydro Electric Project (DHEP) Doyang. The application forms for the 8 (eight) months training course will be issued from the respective Labour Welfare Centre's during office hours. The last date for submission of the application forms will be on or before 15th March, 2024. As seats are limited applicants will be selected on first cum first basis. The Department will provide all the training materials, kits, free of cost to each trainee throughout the training period.

**Sd/- (Er. S. L. WATIAIER)  
Labour Commissioner  
Nagaland, Kohima.**



# Venezuela hon atoba tesem ka anenbanga nisung 23 asü



**La Paragua, Tsüklai/February 22 (Agencies):** Venezuela nung ozüing alema hon atodak tesem ka anenbanga nisung 23 asü.

Bolivar state nung ketdangsür kati Bodhbarnü osangbener dang ashiba agi, Bulla Loca ta ajaba open-pit mine nungi nisung tasü mang 23 shi agitetogo.

Iba lendong ya Mongulbarnü atalok.

Deputy Minister of Civil Protection Carlos Perez Ampueda-ia iba lendong indang video ka X nung prokshi aser nisung aika asü ta ashi.

Video nungya ali ongenk toa lir alidak nungkom tanemi anenzüka aluba nguogo.

Nisung kar jena otet aser kar anenbang.

Iba mine nungya nisung 200 shi mapa inyaka liasü ta ashir,

koba anasatiba La Paragua jila nungi rong nung ghonda tenet jajar.

Bolivar state indang secretary of citizen security, Edgar Colina Reyes-i ashiba agi, yirur alirtem ya regional capital Ciudad Bolivar nung aliba mozüki kati anir ao, koba Venezuela yimtiba Caracas nungi southeast tsütsü mile 460 pilar lir aser La Paragua nungi ghonda pezü jajar.

La Paragua nung kinungertem tzükum anasa adenshia pei kinunger indang osang ata liasü.

Rong nungi nisung tasü mang ka agizükdang nisung ka, "Aji küti lir, aji küti lir, aji küti lir," ta jepa liasü.

Tensa asadanga yaritsü atema mitkartem, firefighter aser danga lokti tentet balala tayimtsü ajanga iba tesem

bushia aor, ta Reyes-i ashi.

Lendong ajurur alirtem bushia yaritsü atema rescue team kar Caracas nungia ao, ta pai ashi.

Bolivar region nungya gold, diamonds, iron, bauxite, quartz aser coltan jenti lir. Sorkari lapoka aliba mines dak alia yangji ozüing alema senti oset agiteter aika kumogo.

"Iba ama lendong ya ataloktsü temetet liasü, kechiaser miners mapa inyakba tesem ya ozüing agi aziöka mali," ta yangji alir kati ashi.

"Yangi hon aika agitetogo... Nüngdak adokba mechi nüburttem aor," ta pai ashi.

Taoba küm December ita kasa region künbok Indigenous community of Ikabaru nung hon atoba tesem ka anenbanga nisung 12 asü.

# Israel mitkar indang okatsüri Gaza nung kumdanga raratsü ashi

**Jerusalem, Tsüklai/February 22 (Agencies):** Israel mitkar indang okatsüri sepaitem dang Gaza nung tim masüba mapa meinyaktsü ashi aser yangji kuli tejangja makai tashi amshiba aser rakzükraktemba densema lir.

Military advocate general, Major-General Yifat Tomer-Yerushalmi-i Bodhbarnü tekumdangtsü shiti ka züluba nung, ita pongu jungnüa raraba nung sepaitemi inyakba tali tuluba kumdakja jembitsü tasak, ta ashi.

Parnoki inyakba nung magizüktettsüsa inyaktsü ajungmesoa tim masüba sangdong agütsüba, kuli tejangja makai tashi amshiba, civilian indang ki o jen raksatsüba aser rakzükraktemba densema lir aser itemji totuyuba nung aibelenba lir, ta Tomer-Yerushalmi-i ashi.

Iba shiti nung totuyuba alema oa sepaitem inyaksangshiba shia lir aser itemji mitkar yimya masü aser tatem nungbo international sapang nung Israel takoksa ajurutsü ta shia liasü.

Ken o aika bushisüngdangogo aser temerenshi agütsütsü atema Military Advocate General Corps ajanga telemtetba agitsü, ta Tomer-Yerushalmi-i ashi.

"Telok tenting nung masü kijai inyakba aser jembiba ya Israel mitkar indang yimya den meputeper aser Israel military

nung parnok temenden mali," ta lai zülü.

Taoba ita United Nations human rights ketdangsür kati Israel sepaitem dang Gaza Strip nung pua aliba Palestine nung mejungi amshiba anentsü ayongzüka liasü, shirnok mejangiaba tesem nung hopta aika pua ayu, züka merenshi aser mezüngmeshia amshi.

Gaza nung iba rara tenzüker Israel army temi video balala prokshiba nung Palestine nung tebur noklang aika süoshi semzüktür sükseta kima mendaktsüba aser karbo tenük zübangtsür aliba nguogo. Video kar nungbo tetsür aser tanurtema angu.

October 7 nungi tenzüka Gaza nung rara arudang Palestine nung nisung 29,000 dak tema tepsetogo aser iba mapang sepaitemi Palestine nung sense-masa amshiba parnok sasa tangok aser video tem social media nung prokshia liasü.

Ano sepai kari Gaza nung aliba Palestine nung kidang auyaba video tema prokshia liasü aser iba tesem nung aliba Government Media Office ajanga tan ita ashiba agi, rara tenzüker mezüing ita asem tsüngta sen million \$25 jenjang sen, hon aser jenjang tulu aketba osettsüset auyaogo.

Israel-i taziökba makai Gaza Strip amakba atema linük balalai Israel aitsüba mapang ka nung

iba shiti ya zülua liasü. Australia, Canada, New Zealand, Spain aser Ireland densema linük aikati Israel dang arütsü anasa aliba Rafah yimti amaktsü sentong aliba anentsü shia arur, kong Palestine nung million 1.4 shi jenoka lir.

South Africa-i Israel anema December ita International Court of Justice nung ken o ka benokba nung, parnoki Gaza nung Palestine nung ajunga samatsütsü meranger ta tai tonglokja liasü. Obendanger temi ceasefire alitsü obendang magütsü saka Israel dang nisung asüba, ki o jen raksatsüba aser kin ajunga samatsüba nungi kumzüktü asoshi mera ajak agitsü totuyuba agüja liasü.

Israel mitkar indang chief of staff, Herzi Halevi-i army commander tem dangi shiti ka züluba nung army tem ya tapi agi nisung tepseti yokba masü, mang ayangba map aka masü mesüra Gaza nung kin ajunga samatsütsü merangera masü ta rara indang jenjang angatetdakja shiti ka züluba sülen Tomer-Yerushalmi nungi iba ya angashir.

"Asenoki asen tsükchirtem ama masü saka nisung meimchir ama inyaksangshitsüla. Menüngdakba nung asenoki tashi mamshitsüla, kiralongrar aser civilian bendangtetsüla, asen meyong masüba magitsüla, aser mang ayangba video tem metangoktsüla," ta pai shia liasü.

# Pelaba Lemsateper



ASO :  
01.09.1959

ASÜ :  
16.02.2024

LATE IMTINUKSHI AO

Onoki teti meima aliba asür obala Imtinukshi Jamir shiranga aliba mapang nungi tasü nü tashi shirnokisa tamang sarasadem den rongsen aser nübo agi yaritepogo, nenok kija kibong aser lokti ajak dangi tsüngdong marutetaka, iba sangdong ajanga kanga pelaba lemsateper. Nenok temeim mapa asoshi Tsüngremi maneni mojangma ta ozüi saraademtsür.

- Temeim Kinungtsü aser Chirnutem

# SÜR KÜM KA AJUNGBA MENUNGRA BILEMTETER 23<sup>rd</sup> Feb. 2023



Lt. CHUBAINLA (Mopungchuket)

Temeim Oja,

Yashi ama dang bilemer, saka küm ka sütemogo, aser na onok mulung nung teti lir. Nü temeim , ajemalu, taochi akaba kodanga amatsü makok.

Iba anogo nung onoki na kanga menungra bilemteter. Tebangi meshitetsüsa onoki na meimer aser masadangtetsüsa kanga menungrar.

Temeim Jala, Jabasotem, Semchirtem aser Kinungertem.

# Russia-i United States Tir Joe Biden aitsü

**Moscow, Tsüklai/February 22 (Agencies):** US Tir Joe Biden-i Russia Tir Vladimir Putin ya "a crazy SOB" ta ajaba sülen Biden ya "Hollywood cowboy" ama alitsü meranger ta Kremlin-i ashi.

Bodhbarnü California nung public fundraising sentong ka nung jembidang Biden-i nuclear tekumdangtsü shia liasü.

Biden-i jembiba nung telangzüba agütsüdang Kremlin odongtar Dmitry Peskov-i ibai "Hollywood cowboy" ama akumtsü merangba sernung metangshi ta ashi.

Pai jembiba ajanga America nung yimya sayur, ta pai ashi.

San Francisco nung o tatsüka jembidang, "Putin nung ama tamachi SOB lir aser asenoki teti nuclear rara atema shisabolua bilemtsüla, ajisüaka meimchir asoshi tebilemtsü tulutibaji tzü-mopung ya lir," ta Biden-i ashi.

US tiri iba ama danga temulung yirutsütsüsa o tamajung jembiba ya tang mezüing masü. 2022 küm Biden-i Fox News osangbener ka dang azü tetsü indang jabaso ta aja.

Taoba mapanga pai Putin ya shileper aser rara nung mapa tamajung inyaker ta shia liasü.

"Iba o yagi asen tir dak mokongshitsü. Saka iba ama o jembir indang jenjang ajema akumtsü," ta Kremlin odongtari ashi.

Pai Hollywood cowboy ama reprangtsü meranga jembiba, saka aji tamakoktsü, ta Peskov-i ashi.

"Nü indang jembidang Putin-i o tamajung ashi asü? Pai kodanga o tamajung mejembiba. Anungji iba ama o yagi America nung jenjang ang ajemer," ta pai ashi.

California nung Biden-i Donald Trump daka tenük yoker jembiba, shiba November ita tir election nung pa den tokteptsü amai lir.

Trump-i pa ya Alexie Navalny den medemdanga liasü. Navalny ya Russia nung opposition ka liasü aser taoba hopta tepuokdak asü.

Republican telok nungi Trump-i Navalny asüba atema Putin tenüing masen, saka Biden-ibo Russia tir mapa lir ta ashi.

Taoba hopta Putin-i November ita tir election nung Trump melen Biden ang adokdaksüner ta ashiba ajanga nisung aika süngmanga liasü.

"Pa nisung tejen lir, pa yimya takzüteter, pa akhi yimya nung yimsüsür ka lir," ta Putin-i Russian TV dang ashi.



# North-East Olympic atema renemshiba senden menogo



**Dimapur, Tsüklai/February 22 (TYO):** North-East Olympic Games (NEOG) 2024 atema renemshiba senden ka Nagaland Olympic Association (NOA)-i ayongzüka February 21 nü menogo. Iba senden ya Chümoukedima District kübok Regional Centre for Sporting Excellence nung Games Headquarters nung mena liasü. Iba senden nung Sports Associations 15 aser Nagaland Olympic Association ketdangürtemi shilem agia liasü.

Iba asayamung ya March 18 nungi 23 tashi Chümoukedima, Dimapur aser Kohima district tem nung asayatsü. Asayamung nung Archery, Athletics, Badminton, Basketball, Belt Wrestling, Boxing, Cricket, Football, Freestyle wrestling, Lawn Tennis, Pencak Silat, SepakTakraw, Table Tennis, Taekwondo, Volleyball aser Wushu asayatsü.

Senden ya Secretary General lenisüba mena liasü aser house-i, Nagaland nung saisapong ajungketsü atema Chief Minister aser State

sorkari takokba tashi jenjang agiba atema kanga pelaba lemsatepba liasü. House-isa, Nagaland Olympic & Paralympic Games 2024 takok asoshi, shilem agirtem, asaya ayongzükeritem, sports association aser nübürtem shirnokisa teyari tulu agütsüogo, parnok ajak dang kanga pelaba lemsatepba liasü.

Taruba North East Olympic Games nung NE kübok state ti pronglai shilem agitsü imlar aser yamaji renemshi tenzüko. Maneni iba asayamung atema officials, technical delegate aser federation balala nungi züngsem tejentem aika, shilem agitsü aser asayamung nung asaya balala achayangtsü atema Nagaland-i arutsü imlar.

International Olympic Committee-i, Olympic Games nung Cricket asaya ya medal asaya ka kümdaktsütsü atema Nagaland ya cricket asaya benokba mezüngbuba state kümogo.

Iba asayamung nung ano Belt Wrestling benoktsü,

kechiyong NOA-i sobaliba asaya ajungketsü nükjidong lir. Belt wrestling ya international sabang nunga kanga renloka odar aser Nagaland nungi asayartemi India tenüng nung international asayamung balala nung medal dena nguogo.

Asaya 16 prongla atema Nagaland team tem NOA aser asaya balala association tawabangba kübok Coaching camp tem zükogo. Asaya aika nung state team tem nem national level coach aser trainer temi tangazükba agütsüdar.

NOA-isa, taruba asayamung atema liaison officer aser volunteer tem den senden ka menogo. Senden nung volunteers aser liaison officer tem mapa tajung asoshi tenüngsang agütsüba den taruba asayamung asoshi parnok kanga tongtibang lir, ta nenshia metetdaksüogo.

Maneni NOA-i, state nung saisapong lokti tentetem aser talisa asayartem nongita yaritsü aser tamanger ajak dang sarasadem nung nongita yaritsü atema mepeshia metetdaksüogo.

# Khelo India University Games atema Nagaland renema lir



**Dimapur, Tsüklai/February 22 (TYO):** IG Stadium, Kohima nung Khelo India University Games 2023 ayongzüka asayatsü atema Nagaland renema lir.

February 22 nü osangbenertem densen saksemba mapang Secretary, Youth Resources & Sports, Anthony Ngullie-i, Khelo India University Games ayongzüka asayatsü asoshi maongka anguba ya Nagaland asoshi tetushi aser maongka tulu ka lir ta ashi. Paisa, iba asayamung nung shilem ka ama wrestling asaya

ayongzüka asayatsü atema Nagaland kanga junga renemer lir, ta ashi.

Kasa mapang nung Director, Youth Resources & Sports, Kethosituo Sekhose-i, iba asayamung nung asayar 240 aser ketdangür 80 shi-i shilem agitsü, ta ashi. Paisa, asayamung atema ainertem February 19 nü nungi aru tenzüko, ta metetdaksü. Director-i ashiba agi, asayar aser ketdangürtem agizüktsü atema Dimapur railway station aser airport nung reception desk amenoka lir.

Sekhose-i, iba asayamung

nung teburtem Greko-Roman style aser freestyle asayatsü aser tetsürtem freestyle dang asayatsü, ta ashi.

Iba asayamung ya February 23 nü IG Stadium, Kohima nung tenzüksü, kong Chief Minister, Neiphu Rio alakteta jaoker asütsü. Asayamung ya February 25 nü tembangtsü aser ainertem February 26 nü state toktsür aotsü.

4buba Khelo India University Games ya North Eastern state tem nung ayongzüka asayatsü aser tayongertem rongnung Assam tongtiba asütsü.

# Ind vs Eng: England team nung

## Robinson & Bashir na züngoksemogo

**New Delhi, Tsüklai/February 22 (Agencies):** England aser India na Ranchi nung Hokolbarnü nungi tenzüka asayatsü aliba pezübuba test atema England team nung pacer Ollie Robinson züngoksemogo.

Arishi küm 30 tain asayar ya tatemsa England team nungi taoba küm Headingley nung tasembuba Ashes Test asayaba mapang asaya liasü. Iba asaya nung pai over 11.2 dang ball aonba sülen yiruba ajanga masayatetsüsa aküm.

Mark Wood melena Robinson shimogo. Wood ya mezüngbuba Test ana nungbo asayaogo.

Maneni spinner Shoaib Bashir-a team nung züngoksemogo. Pai Rehan

Ahmed melenogo. Arishi küm 20 tain Bashir ya Visakhapatnam nung India den tanabuba Test asaya nung mezüngbuba asaya liasü. Pa visa mapang shitak nung manguba ajanga mezüngbuba test nungbo masayatet.

Tasembuba Test nung run 434 agi tamakok anguba sülen England team 1-2 agi tesülen lir.

Pongububa aser tatembangbuba asaya ya March 7 nü nungi tenzüka Dharamsala nung asayatsü.

### England team:

Ben Duckett, Zak Crawley, Ollie Pope, Joe Root, Jonny Bairstow, Ben Stokes (capt), Ben Foakes, Ollie Robinson, James Anderson, Shoaib Bashir, Tom Hartley.

# Jacob Zhimomi-i M.B.E Zhuikhu Memorial Trophy tenzüksüogo



**Dimapur, Tsüklai/February 22 (TYO):** PHE & Cooperation Minister, Jacob Zhimomi-i, Brehostibarnü 25buba silver jubilee M.B.E Zhuikhu Memorial Trophy Gold Cup tenzüksüogo. Iba asayamung ya 'Blow the victory trumpet' omen nung ajemdaker Niuland jila nung asayadaki.

Anogo ti asayatsü aliba asayamung ya Western Sumi Sports Association-i ayongzüker aser Niuland Area Sports Association-i host süa asayadar, kong WSSA kübok unit 11-i shilem agidar.

Sentong nung o jembiba mapang Jacob-i, lanurtem dang parnok nükjidongtem tongtettsü atema bendanga agüja inyaktsü ajungshi aser ashiba agi, saisapong ajanga nisung ka taküm tajungba küma melenshidaktsütettsü. Paisa, lanurtem dang yimjung asoshi brand ambassador kaka akümtsü aser lokti nung parnok

khuret angatetsü ajungshia liasü.

Maneni pai, Sumi nunger tsüngda tesendaktep akangshitsü atema iba sabang tentetba atema WSSA tenzükeritem nem tenüngsang agütsü aser temelenshi tajung asoshi iba lokti tentet maneni tejakdangi bener aotsü ajungshia liasü.

Minister-isa, Silver Jubilee nüngshilong sayatsü aser Executive Secretary, WSSAK Rev. Dr. Phugoto Sema-i bendanga agütsü sarasadem agia liasü.

Minister meina Advisor & MLA (IT & Communication and Economics, Statistics & Evaluation) Sethrongkhyu Sangtam, Advisor & MLA, Fisheries & Aquatic Resources, Pangjung Jamir, MLA Dr. Sukhato Sema, Naiba Konyak aser Imtichoba Chang nungeri iba sentong nung shilem agia liasü.

**BILEMDANGANG**  
"Yimayimpong agi nisung ka jangjadaktsür."